

吳都文粹續集

二十

總校官進士臣繆琪

校對官主簿臣汪日贊

謄錄監生臣曹夢齡

欽定四庫全書

吳都文粹續集卷二十四

明 錢穀 撰

山水

橫塘

范成大

南浦春來綠一川
石橋朱塔兩依然
年年送客橫塘路
細雨垂楊繫畫船

曉泊橫塘

短夢難成却易驚
披衣起漱玉池清
遙知中夜南風轉

洶洶前村草市聲

出橫塘

韓奕

未曉出橫塘舟遲覺路長
岨痕秋水落曙色海霞涼
短褐迎霜授新粳帶露嘗
山中與僧約不比仕途忙

出橫塘

蔡羽

鷺啼吳苑秋千靜寒作春陽草色遲
高低紺宇山幾寺
遠近青溪花半枝
叅燈已扣松邊笈
賽鼓遙從水上祠
繡壁丹崖隨意宿
梅洲蘭渚纜頻移

曉出橫塘路

朱琬

曉出橫塘路塘橫物色賒
鶯聲歸柳嫩燕影掠帆斜
水積連旬雨溪深夾岸花
孤舟望鄉路去去興無涯

其二

曉出橫塘路塘幽事事清
礙流深樹影喧靜一雞聲
蘆葉晴江遠桃花春水生
渺然歸興發背日獨含情

其三

曉出橫塘路塘深趣亦奇
野花繁曲岸江竹靜疎籬
順

水舟行疾盤雲鶴上遲往來幽玩熟準擬結茅茨

自石湖至橫塘二首

王寵

山水繡相錯清暉如可餐峰形分塢塢沙曲擁灘灘西
蕩荷香拂南屏秋氣寒嘯歌終日裏懶散不簪冠

二

人家叢水竹厥土沃塗泥澤徑菱花覆霞莊稻葉齊漁
人千網集開土五雲栖草履長林下持編且牧羝

橫塘歸

袁表

片月出雲嶠荒烟起茅舍薄暮見漁舟來集澄潭下

橫塘晚興

皇甫湜

郭外有幽棲閒情汴碧溪湖山相映發鷗鳥日招攜霞
色浮塘上鐘聲過水西歸來一邱壑源路使人迷

長蕩泛舟

沈周

發迹過長蕩識此平生始春流方漫衍曠蕩彌十里老
葑蔽重雲敷芽青擬擬正如一明鏡敷蝕銅鑄起西山
欲流照掩卻螺髻美山亦拗怒去南走太湖溪羣勢擁

疊浪爭捷互排擠我恐先我去揮手喝之止湖山四面
好轉側皆可喜此面正佳絕扁舟載西子芳洲有隙地
宜賣脫紕綺移家非丹砂所好在山水

長蕩汎舟

皇甫信

清風江上下銀鈎一片蘆花萬頃秋向晚月明洲子畔
數聲欸乃起吳謳

長蕩在虎丘之北

黃天蕩

張憲

昆明劫燒成灰火臨平葑湖撥不開黃泥萬頃下無底
海眼一絲通往來南徐江邊海鱗走江神頓足黃龍吼
便翻銀漢濯泥沙要使妖蛇先授首

黃天蕩在葑門外

過獨墅

短棹微風窈窕片帆落日橫斜舍傍誰開酒肆牛疲知
是田家

宿獨墅

華幼武

獨墅三更月孤舟萬慮人東行聊慰意北望總傷神水
濶風烟遠秋高稌黍新尚憐魚菜美庶以奉吾親

黃天獨墅在黃天蕩之東獨墅王墓朝天三湖連綴
中微隘如川其實一水也

過車坊漾

蕩舟滄波萬頃搖櫓白鷗渚傍不知新月東起回頭過
盡東方

宿蛟龍浦口

吳一鵬

蛟龍浦口夜停船微雨初收月滿川只恐蛟龍時崛起
忽生風浪攪愁眠

蛟龍浦口在獨墅之東一名頽墩湖其東北又有車
坊漾比諸湖更深又名鑊底潭

過陳湖

陳基

平湖秋色曉蒼蒼鼓枻聲傳浦溆涼鴻雁欲來天拍水
蒹葭初老露為霜菊荒甫里人何在鱸入松江興轉長
不用臨流重懷古葦花菱葉滿滄浪

泊陳湖

華幼武

繫纜陳湖口
茆簷野趣多
薔薇紅炫日
楊柳綠涵波
漁網依時集
農田著處歌
地偏苛政少
其樂更如何

歸闔閭浦

極目烟江盡
頭屈指姚城渡
口世人不理曲
肱自餉黃

雞白酒

陳湖在車坊漾之東
又東為闔閭浦

過龐山湖

楊維禎

湖上足晴晝雨餘生綠陰扁舟到城近曲港入村深野
叟頻相問郎君不可尋西菴有分席吾亦老山林

與龐福一遊龐山留題西隱菴 甯玉

龐山西隱阿蘭若中有高人趣不同千偈瀾翻無滯跡
一塵不到有清風門前湖水三萬頃雨後雲山八九峰
對蜺堂堂無別事一聲漁唱月明中

和

龐福一

松陵城外古招提總入西雲路不迷明月清風深夜靜

斷雲流水小橋低
香含優鉢花饒笑
韻叶頻伽鳥亂啼
如此佳山與佳水
幾多詞客為留題

遊龐山同龐雲翁

干文傳

山本無名惟有名
入山山意自分明
墻隨畦畛高低築
船趁沙灘遠近橫
別墅午晴雞喔喔
隔林風細鳥嚶嚶
山翁獨把烟霞占
五十餘年未入城

龐湖

旺扎勒特穆爾

湖波渺渺鏡光寒
湖上遊人得勝觀
一片霞鋪紅葉渡

數團雪墮白鷗灘再登古宇探龍穴漫汲靈泉煮鳳團
聞說鱸鄉何處是明朝猶約弄漁竿

登龐山

周谷賓

意思宛然在命名良不虛林泉儘幽勝地土亦華腴葵
韭家家業朱陳世世居山靈應不吝寸地著吾廬

過龐山湖

龐龍

年來問族到龐湖風景分明入畫圖細浪魚吹蕩雲日
飛花鳥載度烟蕪憂時范老心常在奉使張騫興不孤

却笑十年名利客蹉跎萍迹尚東湖

龐山湖在澹臺湖東自分水墩流入甘泉橋匯於此
其下流為黎湖菱湖葉澤湖新湖

題九里湖

吳驥

太湖風濤湧銀屋望處令人駭心目豈知數里小澄湖
近接吳淞烟水曲未能朝宗會百川頗擅清虛遠塵俗
沿堤冉冉春流漫拍岸溶溶朝雨足桃花浪煖鏡光明
時動微瀾皺輕縠忘機鷗鳥自往還無意菰蒲為誰綠